



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10 Yangia anidakangma : f Tir Yimiyim

Instagram tiryimiyim@aolima

YouTube tir yimiyim TAPAK 3

AIBA champions & veterans committee mendenbula asütsü Mary shim

LJP Tripura state president Rupam Kar apu

VOL. XVIII NO. 139 (ADOK 139) DIMAPUR YANGTEPNÜ (THURSDAY) METSÜREMI (MARCH) 04, 2021 ₹ 5.00

COVID Nagaland: Nisung 5 dak putet

Kohima, March 3 (TYO): Nagaland nung COVID-19 Anogo ananü nisung shinga dak meputet arur Bodbarnü Nagaland nung nisung 5 dak COVID-19 aliba putetogo.

"Tanü Kohima nung nisung 5 dak COVID-19 aliba putet" ta Health & Family Welfare Minister, S Pangnyu Phom-i ashi.

Nisung 12,205 nungi parnok 11949 taneptsü nguogo.

Nagaland nung COVID-19 nungi taneptsü angubaji 97.90% lir, ta paisa metetdaksü.

"Nagaland nung tang nisung 12 anepaludar. COVID-19 puteter nisung 91 asü saka parnok 10 bo tanga timtem ajanga asü aser nisung 153 tanga state temi ogo" ta Health & Family Welfare Department, Dr Denis Hangsing-ia COVID-19 bulletin nung metetdaksü.

Nagaland Governor RN Ravi-i jembiba aitsür: NSCN (IM)

Dimapur, March 3 (TYO): Bodbarnü NSCN (IM)-i Nagaland Governor aser Centre atema Interlocutor, RN Ravi-i jembiba onük aitsüogo.

Indo-Naga yimten olemtep atema teloktem maneni jembishinüdar aser olemtep junga dang agidar, ta MIP, NSCN/GPRN sangdong ka nung metetdaksüogo.

"Tawa Nagaland Assembly nung RN Ravi-i mebilemdangi Indo-Naga yimten olemtep tembangogo ta jembiba ajanga terata adokdaksüogo. Pai aiben jembishinüa arudang Interlocutor ka ama masü saka Nagaland Governor ama dang jembir. Pai Interlocutor ka ama mapa shitak meinyaker" ta MIP-isa ashi.

Naga yimten latetba nung metokmeperi malitsü atema August 3, 2015 nü NSCN/GPRN-i sign asüba Framework Agreement lepshir. Taoba Parliament session nung Indo-Naga yimten olemtep indang

osang ashidang Union sorkari olemtep tatemleni arudar ta metetdaksüogo.

"Iba ya Indo-Naga yimten olemtep jenjang lir aser NSCN nungi jembishinürtemi Naga nung maitsü kümzüka ayutsü atema meranga jembia arudar" ta NSCN/GPRN-isa ashi.

Ravi-i linük tsüngdang iba ama osang tai sangoktsüba atema sasa bilemer. Pai India sorkar aser Indian Parliament-i ashiba den kanga meputep jembio. Naga yimten tebilemsü atema jembidang kanga junga shisadanger ang jembitsüla ta parnokisa metetdaksü.

"Telok anaprongi Indo-Naga yimten olemtep ya Naga nung aser India sorkari agizüktetsüsa lemtetsü atema jembia arudar. Onoki kodanga Naga nung maginütsüsa meinyaksü aser molungtepba ama mesüi agreement kecha nunga sign masütsü" ta MIP, NSCN/GPRN sangdong nung metetdaksüogo.

BJP Mokokchung ketdangsürtemi DAC magizüker

Dimapur, Metsüremi/March 03 (TYO): Nagaland BJP state president Imna Along Longkumer melentsü atema takhangba agütsüba Mokokchung district nung BJP ketdangsür trok-i BJP district office ajanga shimtetba 'Disciplinary Action Committee' magizüksü lemtet, ta sangdong ka ajanga ashi.

Ibai temzüng dak mapet, tejangja masü aser tashi kecha mali shimtetba lir, ta Nuskshi I.

Ozukum, Vice President, BJP Mokokchung District; T. Nukshi Jamir, Vice President, BJP Mokokchung District; Watitemsu, Vice President, BJP Mokokchung District; Lanuyanger Longkumer, Secretary, BJP Mokokchung District; Tekanungla, Secretary, BJP Mokokchung District aser Alepla Chang, Secretary, BJP Mokokchung District nungertemi sangdong ka nung ashi.

(Maneni tapak 2 nung...)

Nija mozü kitem COVID19 vaccination centre ama amshitsüla

New Delhi, March 3 (Agencies): Centre sorkari state aser Union territory (UT) ajak dang nija mozü kitem COVID19 vaccination centre ama amshitsü mepishia metetdaksüogo.

Mongulbarnü Centre-i nija mozü ki ajak coronavirus vaccination centre ama amshitsü osang sangoktsü. AB-PMJAY, Central

Government Health Scheme (CGHS) aser State Insurance Schemes, kübok züngsema maliba nija mozü kitem coronavirus vaccination centres (CVCs) ama amshitsü akok ta Union health ministry-i ashi.

COVID19 vaccine peria dang lir aser state o UT temi nüngdakba ama agütsütsü, ta Centre-isa metetdaksüogo.

CM Rio-i anir MLA temi COVID-19 vaccine agi



Naga Hospital Authority Kohima (NHAK) nung Chief Minister Neiphiu Rio, pa kinungtsü Kaisa Rio aser Dy CM Y Patton nung Covid vaccine agidang tangokba noksa angur. (Kohima, March 3)

Kohima, March 3 (Agencies): Bodbarnü Nagaland Chief Minister Neiphiu Rio-i anir pa kinungtsü Kaisa Rio, Deputy Chief Minister Y Patton, Cabinet Minister tem aser MLA temi COVID-19 vaccine mezüngbuba dose agiogo.

"Kü temang akhi ama junga dang lir" ta Naga Hospital Authority Kohima (NHAK) nung vaccine agiba sülen CM Rio-i ashi.

"Asen linüki vaccine yanglutetba atema nüma atanger. Mezüngbuba shilem nung healthcare aser front line workers nem agütsüogo aser tang teintet rogotem aser temang nung tashidak alir arishi küm 45 ser temapurtem agir. Anungji, iba ya asenok ajaki vaccine agitsü maangka ka lir" ta paisa metetdaksü.

"Nisung ajaki na anasa aliba moz kidangi orr vaccine agitsüla. Ano, mezüng dose agirtemi

anogo 28 lir külen tanabuba dose agitsüla" ta Rio-isa ayongzüker.

COVID-19 vaccine ajanga linük nung shiranger ajemtsü aser rongsenkettsüng tsütsü takarba akümsü imlar ta Rio-isa ashi.

Nisungtemi vaccine agitsü nungnangba atema osangbenertemi asüngdangdang "January 16 nungi tenzüker Mongulbar tashinungnisung 31,391 nem COVIDSHIELD dose 37,000 tema agütsüogo. Iba ya temolung melemi bilemba sample nung kanga ajema putetba agi asütsü akok" ta CM Rio-i langzü.

"Nisungtemi zübazüba bilemer asütsü akok saka asenoki kecha masütsü'ar ta mebilemi vaccine agitsüla" ta paisa metetdaksü.

Tanü NHAK nung Advisor K T Sukhalu aser Advisor Phukayi natia vaccine agi aser külen District Hospital Dimapur nung Minister Kashiho Sangtam aser advisor Neikiesalie Kire nati

vaccine agi.

Maneni, Health & Family Welfare minister, S Pangnyu Phom-ia tanü Dimapur nung Covid-19 vaccine agiogo.

"Kohima aser Dimapur nungi tenzüker meta talang pilar aliba tesemtem nung alirtem ajaki vaccine agitsüla. Ni tanü Covid-19 vaccine dose mezüngbuba agiogo aser anogo 28 lir külen tanabuba dose agitsü" ta Minister Pangnyu Phom-i ayongzüker.

Tanü Forum for Nagaland Reconciliation, Convenor Rev. Dr. Wati Aier-i vaccine dose mezüngbuba agi.

"Tia kaa Covid vaccine agir mezüngpur nung densemogo. Vaccine agiba ya kanga tongtipang aser nisung ajaki aser talisa teintet rogotemi vaccine agitsüla. Social media nung olulu prokshiba nung mamangtsüla saka Tsüngrem dak dang tamang ayutsüla" ta Dr. Wati Aier-ia ayongzüker.

Mar 5 nü 'job reservation policy' atema senden amentsü

Kohima, March 3 (TYO): Nagaland sorkari March 5, 2021 nü Kohima nung reservation policy atema senden tongtipang ka ayonga amentsü.

"Cabinet Sub-Committee den Chief Secretary aser Home Department-i sendaktepa alir ajak den senden ka amentsü. Iba senden nung nisungtemi pei pei tebilemba metetdaksütsü imlar" ta CM Rio-i ashi.

"Asenoki inyakyim ka sülen anidaktsüla. Nübertem nem temelenshi angatetdaksütsü atema policy ka mapa küma m e i n y a k d a n g asüngdangyatsüla" ta paisa ashi.

Eastern Naga Students Federation (ENSF)-i sorkar mapa nung shilem 45 lemsütsütsü takhangba agütsür saka iba ya kin

hohotem aser Naga Students Federation (NSF)-i anir kaketshir telok aikati magizüker. Iba ajanga state sorkari Nagaland Staff Selection Board (NSSB) maparen sota lir.

Nagaland nung reservation policy tasen ka yanglutsü atema state sorkari Deputy Chief Minister Y Patton-i anir Cabinet Sub-Committee ka tentetogo.

Parnoki kin hohotem aser civil society teloktem den tamasa asüngdangyaba sülen ang policy ji renemtsü.

March 5, 2021 nü sendenji anepdang 10-11 ako nung Hotel Japfu Kohima nung amentsü.

Medical College Mon indang kimung atema ashishitepba onük atema CM Rio-isa ashiba agi pai ENPO, Konyak Union aser Mon district nungi MLA

tem den osang agitepdar.

"Tebilemsü onük kar alitsü akok saka iba ya khuret ka masütsüla kechiyong kimung aser tanga onüktem angatetteptsü" ta paisa metetdaksü.

"Mon jila aser temeket nung ali tajung aika lir aser kimung atema khuret ajurura, temeket nung tesem tajung aika lir," ta Rio-isa ashi.

February 26, 2021 nü Union Health Minister Dr Harsh Vardhan-i Chief Minister Neiphiu Rio, cabinet minister aser MLA tem lia Medical College Mon yanglutsü atema lung azüngtsü.

Ajisüaka, March 2, 2021 nü Chi aser Goching Village Council temi Medical College Mon yanglutsüba kimung atema ashishitepba metetdaksüogo.

Mokokchung nung Food safety awareness sentong agi



Dimapur, Metsüremi/March 03 (TYO): Mokokchung Municipal Council ajanga Food Safety Branch, Chief Medical Officer Office, Mokokchung den lungjemer shi amshiba nung tali rangloker Food safety and quality control indang awareness sentong ka MMC Conference Hall, Mokokchung nung March 3, 2021 nü agia liasü.

Iba sentong nung Shashank Pratap Singh, ADC & Administrator, MMC menden liasü, shibai sentong nung adenertem pelashishia agizük aser shi achiba ya kibong shia kanga tongtipang aser

nüngdakba yimya ka lir, anungji shi ayokba tesemtem müreka ayutsü aser life stock certification ajaki amshitsüla, ta ashi.

Merenlemba Ao, Designated Officer, Food Safety, Mokokchung ajanga food safety and quality control dak sendakba nung ajemdaker, talisa shi agi yangluba chiyongtsütem indang onük nung jembia liasü.

Pai shi ayokba tesem amenokba, osettsüet amshiba, belenshiba, mesen aziokba, shi amshirtem mürekmejuba amala indang jembia liasü.

Dr. B.M.Sunep, CVO,

Mokokchung ajanga shi müreka amshiba indang jemi aser Lanu Tsuknung, Implementing Agency, MMC Abattoir ajanga kasa onük nung jembia liasü.

Iba sentong nung shilem agirtem ya shileper, shi ayoker, AWUM Office Bearers, Managing Board Members ajak (MMC Abattoir), Village Council Chairman aser Mokokchung, Ungma, Chuchuyimpang & Khensa yimtsüngtem shia nungi züngsem kaka liasü.

Sentong nung adenertem sensaksema den külemi onsite registration agia aser license agüja sentong tembang.

Nüburtemi timtem balala ajangshibatem NVCO-i angateter

Dimapur, Metsüremi/March 03 (TYO): Nagaland Voluntary Consumers' Organisation (NVCO) ajanga hopta ana World Consumers' Rights Day among tenzüker ananü buba nung consumer tem, talisa state yimtiba nung alirtem metokmeperi ajangshiba indang lemsatap.

Tawa mapa nungi anisüngzüker aliba officer tetsür kati pickle yanglutsü atema P.R. Hill junction, Kohima nungi raja mersü seret 20 ali, koba plastic bag ana nung seret tere-re lemsa seper liasü. Bag ka (seret ter) agi pickle yangluba mapang mersü ya kanga ajema ajiteta lai seret ter aliba bag danga ka ya asadang nung seret ti dang liasü.

Ano lai Local Ground, South gate nungi süngmok (ginger) seret pongu ali aser mapang tatsüka lir lai tanaben seret otang nung seret 4.250 dang liasü aser kasa tesem nungisa lai apple seret ka ali, aser iba mapang süngjang ayokeri pelashishia naring ana inoksemtsü, saka lai asadang dang naring ana ya denera seret ka agi mapensa liasü.

Mapang talangka nungi NVCO ajanga shileper temi seret shidak mamshiba indang ashishitepa aru, saka tanübo shileper kisüng masü saka

aonsotsü, süngjang-lijang amala nunga tuozük shidak magütsür. Iba ama metokmeperi ajangshiba consumer ka ya tejangja nisung aser senso tajung ka lir, saka la ashioktsü.

Iba mesükba ashishitep jenti lir, saka tanüngertemi süoki ia meshisadanger. Jila nung senzüba bus amala nung sen tali meshiba indang NVCO dangi osangtem arur. Taoba mapang para senpak ter liasü aser uniform nung aliba kaketshir dang tajemba meshi saka tashidak wara mechi passenger ajak sorkar indang SOP amshitsüsa akum, anungji nisung ana amentsü aliba menden nung nisung ka dang amentsü mela aser passenger shia dang senpak 20 meshi.

Saka tangbo bus aika nung SOP mamshir aser kaketshir süaka dangar süaka senpak 20 meshir, ta NVCO ajanga ashi.

Ano ambulance, commercial garitem aser taxi amala amshiba nunga sen tali meshiba osangtem lir. Tashidak wara mechi nüngdakba oset tem nung sen tali temloker meshiba mesüra tashidak wara mechi totzü/motor spirit nung tax tali temloker indang osangtem kanga lir.

Sorkari nokdang liaka

yimya balala nung senotsü bendenba (fund raising) osangtem NVCO-i maneni angashir, kong buffet/lottery ticket, calendar, mena sor aliba chiyongtsü aser yamaji oset tabu balala ayoker, ta ashi.

Mapang süyir (expiry) aliba osettem aser sub-standard osettem ayokba osangtema angashir, koba consumer asoshi timtem lir. National Food Security Act kübok jang anguba nung sen tali temloker mesüra jang tajemba nung agütsüba osangtem angashir aser iba atema state sorkari tang tashi Act nung aliba ama Food Commission amenoka mali, ta NVCO tiri ashi.

NVCO ya molungtet telok ka amai asünung ozüing alema inyaksangshiba asoshi mera agitsü tashi mali. Ajisüaka NVCO ajanga District Administration, Regional Transport, Civic Bodies, Department of legal metrology & consumer protection, talisa weights and measures dang consumer temi timtem balala ajuruba repringtsü ajungshir aser mapang shia item tesemtem mita ao nung kanga ajungtsü, kechiaser totuyuba kisüng agütsüba agi teperi masü, ta NVCO ajangasa ashi.

BJP Mokokchung ketdangsürtemi... (TAPAK 1 NUNGI...)

February 22 nü senden amenba mapang district mendenpurtemi BJP Nagaland state nung lenir jenjang mejungi akumba indang tatsü-talang jembia liasü.

State tir melentsü asoshi telemtetba agiba nung BJP Mokokchung district ketdangsür

troki meyongnem agütsüba record yua lir.

Iba ama tensa ka nung district secretary, Lanutoshi Convener sür 'Disciplinary Action Committee' ajanga komasür district office nung February 22 nü district office ajanga telemtetba agiba indang tiazi

yamai jembir, ta süngmanger, ta sangdong ajanga ashi.

Anungji 'Disciplinary Action Committee' ta nüngja agüja alirtem yagi district mendenpurtemi telemtetba agiba nung tai aputsü tashi mali ta angatetsüla, ta kasa sangdong ajangasa ashi.



Ao Baptist Arogo Mungdang (ABAM)

IMPUR-798 615, MOKOKCHUNG, NAGALAND, INDIA

E-mail: abamimpur7@yahoo.co.in

Website: www.abamimpur.org

Date: 03.03.2021

ABAM-I "MARY MEAD CLARK HER LIFE AND LEGACY" KAKET NOKDANGER

February 25, 2021 ABAM Sanen Luden Telemtetba/2021-20 ama; Narola Ao McFayden-I zuluba kaket "Mary Mead Clark Her Life and Legacy" koba Clark Theological College, Aolijen ajanga 2019 kum publish süogo; iba kaket nung arogo otsüren tashishitsü repringtet nung, iba kaket mayoktsü aser mebelenshitsü.

Rev. Dr. Mar Atsongchanger, Executive Secretary, ABAM.

DC Kohima ajanga land compen-

sation atema metetdaksür

Dimapur, Metsüremi/March 03 (TYO): 2 - Lane Kohima - By-pass kübok Chainage 13+800 nungi Chainage 21+000 (Package II - 2nd list) atema land compensation ya March 6, 2021 anepdang 10:00 ako nung Deputy Commissioner, Kohima indang Office nungi agütsüta, ta Deputy Commissioner Kohima, Gregory Thejawelie NCS ajanga sangdong ka nung metetdaksü.

Anungji ali kibur tem tsüngtong aruba den tawa tangokba passport size noksa pezü (scan masütsüla), Aadhaar card (Xerox)/I.D Proof aser Bank Passbook (Front page Xerox) bener arutsüla.

Ali kibur jangjatsü asoshi Council chairman mesüra chairman-i shimetba nübu ka arua alitsüla. Ali kibur dak alaka dangar shinga nema senotsü magütsüta, ta sangdong ajangasa ashi.



Longleng District Legal Services Authority (LDLSA) ajanga Yingli Collehe nung March 2, 2021 nü anogo ka Legal Awareness Programme ayongzüka liasü. Iba sentong nung Hamnyei Angh, Project Assistant menden liasü. Sentong nung shisalen sayur P Moneyi Phom, Panel Lawyer ajanga Motor Vehicle Act indang jembia, Panel Lawyer Chingmei Phom-i cyber crime indang jembia liasü. Maneni Secretary LDLSA, Ajongba Imchen-i constitution nung nüburtem nem temenden agüja aliba indang jembia liasü.

Kohima nung Inter-High School kenshi-oshi tetoktepba agi

Dimapur, Metsüremi/March 03 (TYO): Anogo ka district level Inter-High School kenshi-oshi tetoktepba sentong ka Department of youth Resources and Sports ajanga March 03, 2021 nü Lower Forest Colony indang Community Hall nung ayongzüka liasü, kong "The internet created to be a change" aser "Different forms of addiction among students" onük nung essay züluba aser quiz tetoktepba agia liasü.

Kaketshirtem jembishini, zülubanglu nung renloktsü nükjidong nung iba Inter-High School kenshi-oshi tetoktepba sentong ya ayongzüka, ta sentong lapoka jembiba mapang District Youth Resource Officer Chubarenla Longchari-i ashi.

Iba tetoktepba nung takok nguang tengu, nenok tajangzük kaka bo ngur kidangi aotsü, ta lai kaketshirtem ajungshia liasü. "Takok anguba ya tenüng ka

dang aser aji samatsü, saka nai angazükba shisatsü teti alitsü," ta laisa ashi.

Iba sentong nung Chandmari Hr. Sec. School, Mt. Hermon, Stella Hr. Sec. School aser Northfield school tem nungi shilem agia liasü, kong Dr. Moaakum Kichu Asst. Prof. Dept. Of Botany, Kohima Science College aser K. Alibo Achumi Asst. Prof. Dept. Of Sociology, St. Joseph's College Jakhama na tetendanger liasü.

Essay tetoktepba nung Chandmari Hr. Sec. School nungi Emao M. Lam-i mezüngbuba jenjang ngutet aser Stella Hr. Sec. School nungi Hisinle Kemp-i tanabuba aser Northfield School nungi Kechanei-u Huozha-i tasembuba jenjang nguteta liasü.

Maneni quiz tetoktepba nung mezüngbuba jenjang ya Mt. Hermon School-i angu, tanabuba aser tasembuba jenjang ya Northfield aser Stella Hr. Sec. School nati ngua liasü.

LJP Tripura state president Rupam Kar apu



Rupam Kar

Agartala, March 3 (Agencies): Lok Janshakti Party indang Tripura state president Rupam Kar-i nisungtem ashiochtsüba atema puogo.

Rupam Kar ya Bardowali nung alir aser pai foreign liquor dokan aser mapatem agütsüta ta shia nisungtem ashiochtsü.

Pai nisungtem ashiochtsüba nung Rs 60 lakh shi ajangtetogo.

December 18, 2020 nü Kar anema ken o ka benokba nung

ajemdaker pa apu.

Crime Branch supervising officer & deputy superintendent of police Ajay Kumar Das, investigating officer inspector Benu Lal Kar aser sub-inspector Ashish Sarkar nungertemi Bardowali nung Kar'er ki mita ao.

Idangji parnoki arishi kum 25

tain Kar apu. Pa ket nungi taila kulikakettem, sorkar ketdangsurtem, ONGC aser Indian Oil indang rubber

stamps, computer aser printer ngutetogo.

Kar-i sen yong taila liquor license, petrol pump allotment aser job offer letters agütsü.

TCS, superintendent of excise Sabyasachi Singh-i police tsungdang ken o ka benokba sülen pa apu.

North Badharghat nung alir Tapan Saha-i taila kulikakettem agütsü saka ibaji bushisingdang aodang Rupam Kar-i Saha ashiochtsüba bushitet.

Assam Agricultural University professor mapa nungi anentsü

Jorhat, March 3 (Agencies): Jorhat nung aliba Assam Agricultural University (AAU) nung professor kati PhD kaketshir ka dak tim mesüi kongshiba atema tai tonglokja mapa nungi anentsüogo.

Horticulture department nung professor Bijit Kumar Haud ji Mongulbar nikongdang mapa nungi anentsü.

Tetsür kaketshir dak tim mesüi kongshibaji Deobarnü atalok aser iba atema internal enquiry committee-i bushisingdangtsü.

Kaketshirji Manipur nungi lir aser lai University Vice-Chancellor, Bidyut Chandan Deka dangi shidi zülu.

Osang angazükba agi tetsürla tetsüia Vice Chancellor dang iba tatalokba osang sangoktsü.

Iba dak sendakba University registrar Arpan Khound-i professor Bijit Kumar Haud mapa nungi anentsüba tetuyuba agütsüogo.

Univeristy indang Internal Complaints Committee-i ashiba agi tetsürlai committee tsungdang ken o mebenok saka Vice Chancellor-i ang shidiji agütsü.

"Onoki iba ken o atema mapa metenzük lir kechiyong zungsemtem jatepa senden ka amentsüla" ta committee mendenbuba Satvinder Kaur-i ashi.

Jorhat district kubok Rangapara nung aliba alu ka nung tetsürla dak tim mesüi kongshi ta ashir. Iba tesem nung lai experiments agir.

Iba mapang principal investigator Dr Haud-i la meina ao.

University indang alu nung tsünusenbongtsü melira kaketshirtemi aluyimer indang alu nung oa experiments agir.

Iba mapang professor ji yi jemer liasü aser pai la danga yi ajemtsü ashi saka majem ta kaketshirisa shidi nung shia lir.

Assam Agricultural University (AAU) nung kum asem atongtepa tetsür dak tim mesüi kongshiba ken o tem adokogo aser iba ya maaksü ka lir ta professor kati ashi.

2019 kum Economics and Farm Management nung senior professor Jyoti Gogoi-i tetsür kaketshir ka dak tashiyim agi mapa inyakba atema tai tongloktsü. Ano, 2020 nunga Agronomy nung professor Abhijit Sharma-i tetsür dak tashiyim mapa inyakba atema tai tongloktsüba sülen pa soset.

Lungnila Elizabeth tepsetsang UNLF-i tepsetogo

Imphal, March 3 (Agencies): Manipur nung arishi kum 8 tain tanur Lungnila Elizabeth dak tashiyim agi shi nung medemba sülen tepsetba ken o nung tai tonglokja alir Thokchom Nando Singh (KCP Nando) tepsetogo.

United National Liberation Front (UNLF) zungsemtemi KCP Nando tepsetba osang social media nung metetdaksü.

Pa ya Kangleipak Communist Party nung telok ka indang lennir liasü aser pa nem 'capital punishment' agütsüogo ta UNLF-i ashi.

UNLF-i Nando indang tasüang aser noksa ka sayu.

UNLF-i Facebook ajanga ashiba agi, tetsürtem dak tashiyim mapa inyakertem ozüing tapet agi merenshitsu.

Elizabeth ya Manipur minister Francis Ngajokpa'er

jala liasü aser 2003 kum Nando-i tepset.

Nando-i aniba telok kati November 2003 nung Lungnila Elizabeth sen yong pur ao. Ajisiuaka, la school nungi pur orr anogo 8 lir sülen la indang tasüang angu.

Police-i la temang reprangdangdang tashiyim agi shi nung medemba kuli ngutet. La ya Rs 15 lakh atema apuba liasü.

Iba tatalokba sülen police-i Nando apu saka JNIMS Hospital, Imphal indang orthopedics ward nungi pa jena ao.

Anepdang 6:00 ako meta jail warder kati KCP Nando reprangi aodang pa jena orr liasü, ta police-i ashi.

Pa jena aoba sülen Manipur police-i pa putsü atema osang sangoktsür nem Rs 1 lakh agütsüta ta nangzüka liasü.

BJP aser AGP tsungda menden melemsateter

Guwahati, March 3 (Agencies): Assam nung assembly menden lemsaba nung BJP aser Axom Gana Parishad (AGP) tsungda mangatetep tulu adoka lir.

BJP aser AGP tsungda State-level nung Assam Assembly election atema menden lemsatepba nung haihaura mekateter ta osang ajanga ashi.

Iba jagi Bodbarnü AGP lennirtemi Delhi nung BJP National president JP Nadda den ajurutepogo.

Hombarnü Guwahati nung

assembly menden lemsateptsü atema senden ka amendang AGP lennirtemi senden nung medeni oadok.

BJP lennirtemi AGP-i akhangba magizükba atema AGP lennirtemi tejashi nung senden nung maden.

2016 Assam Assembly Election nung AGP-i takok anguba menden 7 shi ka BJP-i meshir ta osang angazüker.

2016 nung Assam nung AGP-i BJP yaritepa arur.

Assam Assembly election indang mezungbuba shilemji March 27 nü agitsü.



March 3, 2021 nü mejangjatetba nisung kari Tripura nung taoba Minister aser Deputy Leader of opposition Badal Choudhury amakba sülen pa GBP hospital-i anir aodang agiba noksa angur. South Tripura district kubok Manirambari nung Communist Party of India (Marxist) CPI-M-i Kokborok oshi atema takum bendanga agütsür Dhananjay Tripura indang sentong ka ayonga agidang Badal Choudhury amak. Bharatiya Janata Party (BJP)-i teyari agüja nisungtemi Choudhury amak ta CPI-M lennirtemi tai tongloktsür. (Agartala, March 3)

I&B Ministry-i Manipur sorkar dang kümdangtsü metetdaksür

Imphal, March 3 (Agencies): Manipur sorkari The Frontier Manipur nem notice ka agütsüba sülen anogo ka lir Ministry of Information and Broadcasting (I&B)-i Manipur sorkar dang kümdangtsü metetdaktüogo.

Manipur sorkari digital media rules tasen kubok The Frontier Manipur nem notice agütsüba I&B Ministry-i aitsür.

Iba dak sendakba nung Ministry of I&B Secretary, Amit Khare-i Manipur Chief Secretary Rajesh Kumar dangi shidi ka züluogo.

"Ministry of Information and Broadcasting, Government of India-i dang 'furnishing of

information aser disclosure of information' ketdangtsüa repranger. Iba tashi ya State Governments/District Magistrate/Police Commissioner nem agüja mali," ta I&B Secretary, Amit Khare-i ashi.

Manipur police-i The Frontier Manipur nem notice ka agütsü saka nisungtemi aitsüba sülen police-i iba notice ji meyipa agiogo.

Manipur sorkari The Frontier Manipur dang Information Technology (Intermediary Guidelines and Digital Media Ethics Code), Rules, 2021 nunga lateta aliba ama kulikakettem agütsüta tetuyuba agütsü.

GOVERNMENT OF NAGALAND DIERCTORATE OF TOURISM NAGALAND: KOHIMA NOTIFICATION

Dated Kohima, the rd Feb, 2021

NO.TOUR (T&S)03/2011-12/

//Interested candidate who wished to undergo 3

Years B.SC in Hospitality & Hotel Administration at IHM Guwahati for the academic session 2021-22 may apply through online on the National Council for Hotel Management & catering Technology website www.nchm.nic.in/www.ntanchm.nic.in on or before 10th May, 2021.

ELIGIBILITY CRITERIA: -

- Qualification: -Passed 10+ 2 or equivalent examination from CBSE, ISE and State Boards of Examination with English as one compulsory subject.
- Age Limit :- Upper age Limit for general Category shall be 25 years and in case of SC/ST shall be relaxable upto 28 years as on 1st July of the year of admission.
- JEE Entrance Examination - 12th June 2021 (Saturday) - 09.00 AM to 12.00 noon.

For more details may contact Principal, IHM Guwahati: +91 8811011770

(AJANUO BELHO)
Director of Tourism



TIR YIMYIM YIMOBILEM (EDITORIAL)

DIMAPUR YANGTEPNÜ, METSÜREMI (MARCH) 04, 2021

JOKO ASENOKIA YOKTSÜ

Bendang tesem balala nungi gari nung dang masü saka train aser tayimtsü nung anogo shia asenok nungdak kechisarina süngasünga bener arua tokzuka toktsür gari aser tayimtsütemji tazüng meyipa aoba mapang ka, tang Nagaland nungi aluyimertemi züsentetba aonsutsü aser süngjanglijangtem ayoktsü atema tayimtsü nung bendangleni yoktsü tenzükba sentongji Naga nunger ajak asoshi osang tajung ka asütsü. Joko, asenok asoshi alu nung züsentetbatem dang masü saka arem nung parnoksa meiba aser atangba süngolemba aser süngjanglijang ajak sen jenjang aketba chiyongtsü kümogo. Asenoki dang tangari chinütsüsa anepalutetra, alu nung züsentetba dang nungibo, ano, arem nung adokba aonsutsü aser arem nung atangba süngjanglijangtemang jenjang tasakba asütsü, kechiyong temang asoshia item arem chiyongtsütemjisa tajungba lir. Asenok limabo takar saka asenokbo sensaker ta asenoki takar kuma ali mashi küm talangka timtema arudagi. Asenok kar akabaji asenoki meranga züsentetba nungi masü saka teimbaka ayongayonga government mapa nungi anguba rongsen agi akabatem dang lir. Itemji junger saka item rongsentemji teimbaka senmang kuma mamshitetter, kechiyong itemji government mapa inyak tashi dang agitettsü aser government mapaji senmang masü. Aji oda, asenoki tezüsena mashi aser züsentetyonga tayokdak maka ta shiba danganga kechianga mashi, asenok tetugulen lenmang mangu kanga akoksaogo. Ajisüaka, tanü asüng ka nungi tanem tanemi asenoka lenmang nguteta aluyimer aikati aonsutsü ase süngjanglijang lu kanga junga yimdagi aser ano lanurtem aikati alu aser arem nungi adokba chiyongtsütemji topur jungjunga seper, tenüng tajung zülua maloker asen lima nung dang masü saka bendang tesem balalai yokdagi. Alu nung adokba züngi mendi, somomo, naring jemben, mamazü, nübang momong, manü, luli aser arem nung adokba zü, rüken, asang, nangjalashi, aitjang aser sürajang ajak yagi asenoki melamelaa sen kümteetsüsa mapang tajung ka aruogo. Itemji jungjunga shidoker chiyongtsü tajung kuma awazür jungjunga seper asenoki tayimtsü nung bendangleni yoktsübaji, joko, lanurtem mapa asütsü. Akhidangbo, aonsutsü aser süngjanglijang talir mali shidokdaksü, kechiyong tamajung mekümdaktsüi ayutsüsa Cold storage-a mali asü, saka tanü asüngbo Agriculture department ajanga aluyimertemi züsentetbatem tamajung mekümdaktsüi temekong nung ayutsü asoshi district shia nung Cold Storage yanglutsür aser ano süngmok aser mersü amabo tamajung mekümdaktsüi jenjangang tur ayoktsüsa machine nung akongtsüsa Dimapur tashi nungbo amenoka lir. Anungji, tangbo talir mali süngmok aser bengana shidokdaksüba otsü to mataloktsü. Aluyimba aser chiyongtsü yangluba aser ayokba mapa ya kanga jangratemtsü mapa ka lir, kechiyong nisung ajak alu nungi züsentetba chiyongtsü chia taküm alitsü. Iba nungdakji reprangteta lanurtemi aluyimba mapatem angazüka alu ayimtsüla, kiset shiruru metsütsüla aser item nung jagi chiyongtsü tapu balala yanglua alima tesem balala nung ayoktsü mangdang aser tejangrabaji lanurtem dak alitsüla. Atangji, nisung kati alu tuluka meyimtettsüa akok, anungji nisung ter metsü kati alu tilala yimra, iba jagi alu tuluka kumadoktsü aser item lu nung züsentetbatemji nisung kati sarudena alizüksü aser pai tayimtsü nung tanga bendang tesem balalai bener yokertem dang ayoktsü ta alu nungi tayimtsü tashiji tonga shishilembatetsüsa tangbo lenmang lapoktetogo. Israel aser Kuwait nungi aser Germany nungi aruba süngjang aser Bihar aser UP nungi aruba alo beyaz aser jangotsü asenoki asen lima nung alia achiba ama, parnok limatem nunga asen lu nung züsentetba chiyongtsü kar danga alia achitsüsa asenoki inyaktetra, idangjiang asenok nüchi akümer asütsü. Asenok tang yabo mozümora achir Rehab nung amonger amai, kazüa alitsü aser tangari kechi bener arutsüdir, aji chiajemer alitsü, asenoki agütsüba aser bener yokba anogobo kata mali. Iba jagi, balaka, Delhi nung dena tangari asen ya kanga nema repranger. Iba amaji tangari asenok ya meshimetsür jenjang nung mezüngoktsüsa, asenoka asenoki züsentetba aser yanglutetba agi tangari asenok metettsüsa inyaktsüba mapang tajung ka asenok dangi aruogo.

OLEMSABANG

PAPER NUNG ZÜLUBA OTEM MESÜRA OCET-TEM YA TANGAR
JILO IA MASÜ, SAKA PEI DAK APETBA ZÜLUTSÜLA

~ R.Imkong Lkr, Dimapur

Koba paper nung südir süaka shibaisa osangtem agütsüba paper nung ocet-tem mesüra tanga osangtem zulur, itemji nükjidong tejangja ka ka yur angsa adoktsür ta asenok paper azüngertemi angateter aser amanger. Yamaji kari ocet ka paper nung zulutsübaji nüburtem asoshi apet asü mapet ta kanga junga shisadanger kelenang zulutsü nungbo nüburtem aika asoshi tajangzük tulu angutsü ta asüba olen ka lemsateper. Kechiyong tanü putu mapang ya joko English nunger aso metsü ser ka puba nung jajadagi, iba denji külemi alima ya tashi temetet nung joko tejakleni talangka odagi. Anungji ocet temalen shai aliba dakji ajemdaker pei pei tangatetba temji jangja jangja zulutsü nung-bo ajak atema tajangzük tulu asütsü ta shitsür.

Yamaji, ashiba amaji 2 Timoti 4:7 nungji "Ni rara tajungji raraogo, ni alizüngji tonga asemogo aser ni tamangji yuogo" ta asüba oren ya aikati mapang shia tasü tama ajuruba mapang nung zulutsüba angudang kagna süngmangasa azünger. Kechiba ta süra iba o yabo sayutsüngir tulu temeshi nisung Paul-i ashiba otem lir. Saka pa yabo Tsüngremi pa yimli atema asaa mezüja shimtetba nübu ka ta temeshi lai ajanga kuli angur. Kenü anogo, kibuba Tsüngremi Anania tang mangdang nung jembia ashi, na oang, kechaiser bendangertem, chubatem aser Israel chirtem dangi küm nung abentsü, pa ni asoshi kü teshimtetba marok lir ta jangja jangja shia angur. T.Mapa 9:15. Aser Paul-i nisung ka pa tasodang nungi khen agi mejajadanga iba anogo nungjagiang Paul-i pa teka nung ammer atsümesoa jajadaksüba angur. Yamajisa ano asangur ka tenüng agi Eutuka ta aser Pauli sayutsüngiba mapang nung kanga anünü ta shia angur, aser paji kijiba nung mener kanga anünüa alitang aoksa ka takdang temalen tapu asempuba nungi tsük aser tasü bener atu. Saka Pauli asanguba atemaji Tsüngrem tang sarasadema tasü nungi shai arudaktsü aser yangji telok sentepa aliba purtem nem pa takümüji meyipa agütsü, aser parnok ajak kanga pelatepa anisüngzük angu. T.Mapa 20:9-10. Aser ano Paul aser tangar telok aeini aortem Publio ta ajaba aset-kong ka nung anisüngzüka alitang, Publio tebo Ramen aser azüsen agi kanga shiranga liasü, idangji Pauli pa dakji teka agi nemeta sarasademja anebtsü, aser ano yangji aliba yimertem tashidak tamajung aketerkem ajak pai sarasademja anebtsü ta shia angur. T.Mapa 28:8-9.

Iba amaji Tsüngremi shimtetba nübu ka den medemdanga "Ni rara tajungji raraogo, ni alizüngji tonga asemogo aser ni tamangji yuogo" ta o tajung aika pei dak mapetba amshia tasü tama ajuruba mapang nung pei kinüngertemi paper nung adoktsüba yabo Tsüngrem tsüngdang temeden ngudi ma? ta nibo aibensa bilemdanger. Kechiba ta süra asenoki amanga aruba nung tanela tekümtet tejangja kar ta pei sasa kuli agütsütet-tsüla, ajita mesüra koda ser asenoki temeshi nisung sayutsüngir tulu Paul ama temeshi nisung ka den medemdanga paper nung adoktsübaji kanga tamashi tangatetba ta nibo angateter. Kechiba ta süra asenoki Paul-i inyakba amaji tasürtem kwika shai arudaktsü? Mesüra tashidak tamajung aketer kwika anebtsü? Aser Kibuba tsüngdang koma ajemalua liyonga aru? Iba amaji mapa tajung kar tanga inyakteta mekara koda ser temeshi nisungi ashiba o amshia paper nung adoktsübaji kanga tamashi tangatetba ta tazünger, ocet zülurtem aser tangashri ajak nem rajemdaktsüner.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Meghalaya nung Jesuit Mission amakdang nisung ka tepset



Meghalaya yimtiba, Shillong nung Jesuit Mission-i achaayangba Loyola College nung kaketshirtemi sentong ka nung ken atenba noksa nung angur. Jesuits' Mission-i Umoid yim nunga college ka lapoktsü sentong lir.

Shillong, March 03, 2021 (Agencies): Meghalaya nung Jesuit Mission house nung bendangertem amakdang nisung ka tepset aser nisung tenet yirua liasü.

February 24, 2021 aonung South West Khasi Hills district kübok Umoid yimdak Jesuit Mission indang St. Xavier's College takdang nung mejanga alir bendanger aayangertem amakba tatalokba dak sendakba nung police-i nisung pongu puogo.

College Principal, Paul Coelho-i, "Kechiba bendanglen nungi arua aayangertemji amakar onoki mejangjar," ta metetdaksü.

Putir, Coelho-i ashiba agi, Jesuit mission nung mapa inyaksü atema February 19 nü Assam nungi aayanger 8 permit

shidak bener aru. Parnoki administrative block aser tetsürtem atema hostel teyangludak liasü.

February 24 aonung tebur 20-25 shi mask agir class takdang telungi aitba sülen süng aser insang amshia aayangertem amak.

Parnok hospital-i anir aodang kabo lenmang tom nung süadok aser tangartemji hospital nung tang temongdak lir.

March 1 nü osangbener den jembidang putiri, "Jesuit mission nung inyaktertem tsükchir mali aser onoki inyakba mapatem ajanga nüburtem kanga pelar. Ajisüaka kechiba onok indang campus amakar onoki mejangjar," ta metetdaksü.

"Yangi aliba lisopurtemi onok nungiter aser parnoki onok

indang reju anüksü ta nangzükogo. Iba reju anüksü atema ketdangsertem police lemezükja mali," ta pai ashi.

February 28 nü Khristantem ibi tatalokba anema longkak ait aser Jesuit mission den tejashi lemsatepogo.

Tribal nütsüng timba aliba state- Meghalaya nung mapang shia kin tsüngda rara adoker aser lisopurtemi Assam nung state-i aruba maginer.

Yaküm March ita nunga state nung Khasi Students' Union (KSU) den raradang Khasi nung ka asüba sülen rara tuluka adoka nisung asem asü.

Meghalaya ya Khristan nütsüng timba aliba state lir. State nung nütsüng million 2.6 nungi nütsüng shilem 75 bo Khristantem lir.

Uttar Pradesh nung BJP student wing ABVP-i Tenla ki karaksatsü

March 03, 2021: February 16, 2021 nü BJP student wing- Akhila Bharathiya Vidyarthi Parishad (ABVP)-i Uttar Pradesh nung Tenla ki ka raksatsüogo.

Khristantem ibi tatalokba osangji police nem metetdaksü, ajisüaka ketdangsertem ibi tatalokba bushisüngdangtsü atema kecha meinyaker.

Osangbener den jembidang Pastors' Association of Bareilly nung Tir, pastor Simon Prasad-i, "Tamangba yimsü balala tsüngda rara adokdaksütsü atema ABVP züngsemtemi Bareilly nung Sadar Methodist

Arogo Tenla ki raksatsü; parnoki Hindu Nationalist yimyim "Jai Sri Ram" ayim aser parnoki Bareilly nung Tenla ki tejentiba jara aser kishi nung rong tepsatsü," ta metetdaksü.

February 17 nü Pastor Prasad den Arogo züngsemtemi ibi tatalokba ken oji police matsüngdang benok, saka police ketdangsertem ken oji magizük.

Tamasabo police-i Khristantem dang Arogo anema kecha matalok, ta ashi, ajisüaka parnoki police nem Tenla ki raksatsüba noksa agütsüba sülen ang ken o agizük aser iba

tatalokba bushisüngdangtsü melunga liasü.

February 17 nü police team ka Sadar Methodist Arogo Tenla kidangi aoba sülen Pastor Prasad dang na itasengi shibai agütsür aser ner kibong mesütsü atema nai sen kong nungi angur? ta asüngdanga liasü.

Mapang shia India tesem balala nung Khristantem aser Tenla kitem amaker, ajisüaka police aser ketdangsertem item ama ken oji bushisüngdang junga masüba agi Khristantem anema inyakba kanga bulua ataloker.



Bangladesh kübok Khulna district nung Khristantem i 'climate change' anema süngdong atemtsü atema bendenba mapang tangokba noksa nung angur. Bangladesh nung Catholic Arogo aser Arogo indang social service agency- Caritas-i linük tesem ajungalen süngdong atemtsü atema campaign ka tenzükogo. Yaküm nungi tenzuka tang tashi nung parnoki süngjanglijang balala dong 400,000 shi temogo aser taküm küm tatembanglen tashi nungbo süngdong ajak agi 700,000 atemtsü nükjidong lir.

ANOGO ABEN TSÜNGREM DEN

Ozüng lungpak

Efesa 4:17-32

Mosai ashi: Aser pai itemji lungpak ana nung zülü aser aji kü nem agütsü. Tazüng. 5:22

Kin shia ozüng balala yanglua lir. Itemji parnok timtemdaksütsü atema masü saka parnok kümzuka alitsü atema ayur. Lendong timtem adokdang aibelentsüji kechi nung lir ibaji ozüng jagi tarakji sayur.

Kasaji Tsüngremi ozüng terji lungpak nung zülur agütsü. Aikati Tsüngremi ozüng meliteter, aser ibaji raksaa inyaker. Memeshiba, azütokshiba, aser libaliro majungba aser iba mesükbatem jagi pei dak aser tangar dak teraksa tulu adokdaksür. Tsüngrem ozüng terji maneni nüburtem kümzüktsü asoshi akanga yua lir.

Tsüngremi Pa ozü ter akanga aser tejangja yanglu kechiaser Pai asenok meimer. Pa temeim tali tejangjaba nung par chir sempet agütsüba nung angatetdaksür, shiba aru aser asenoki temenen ajanga raksaa aliba tasen küma yanglushitsü asoshi meyipa agi. Pauli ashir, "Khrista nung asenok Tsüngrem temeshibaji akümtsü asoshi, shibai temenen memetet pa asenok atema Pai temenen kümdaksü" (2 Kor. 5:22). Shirnokisa Khrista dak pei kibur ama amanger ajak Tsüngrem tsüngdang temeshi lir.

Kibuba Tsüngrem, temeim agi Nai onok nem ozüng ter agütsü. Itemji onoki benshitetsü yariang kechiaser onoki Na meimer. Amen.

Venezuela nung Khristantem nem Laishiba chidakja reshikangshi

March 03, 2021: Tawa Khristan pezüpronglaji Venezuela nung telok kati Khristan tebur pezü kotari agi yirutsü, kangshia Laishiba chidaktsü aser teberem nung kotari agi Kangki yangluja reshikangshiogo, ta Open Doors-i metetdaksü.

February 16 nü Libertador nung aliba Restoration House nung Khristantem reshikangshirtemji mozü-chir telok ka asütsüa akok, ta melung melemei bilemer. Restoration House ya Venezuela kübok Mérida State nung Arogoi lapokba drug rehabilitation center ka lir.

Khristantem reshikangshiba linük 60 dak tema nung inyakba Khristan Charity telok- Open Doors-i ashiba agi, ozüng alema inyaktertem taküm melenshidaksütsü atema inyaker Khristantem anema Latin America nung mozü achir-shibelenertem inyaker, aser parnoki Khristantem ya parnok atema tetsükdaksüka ama züngshir.

Khristan pezü rongnungi kati, "Parnoki onok tejak nembangtsü aser onok dak azükba den kotari agi yirutsü. Parnoki onok temang nung kotari agi Kangki yanglu aser kangshia laishiba chidaktsü," ta metetdaksü.

hospital nungi discharge süogo, ajisüaka kabo tesaret ana sükdangba den tepokpok yiruba agi temang mejungi lir.

"Iba tatalokba jakdang (February tetenzüklen) kiyongertem senden ka nung tebur anati Restoration House ya anentsütsü ta jembia liasü," ta drug rehabilitation center tenzüksang Pastor Dugarte-i metetdaksü.

Ajisüaka pastor Dugarte-i pa tamang jenjang masetshitsü aser maneni iba ministry mapa inyaksü, ta shiogo.

Evangelical Council of Venezuela-ia iba tatalokba junga bushisüngdangtsü atema ketdangsertem nem takhangba agütsüogo.

"Lanur Khristantem temang nung kotari agi Kangki yanglutsüba aser kangshia Laishiba chidaktsüba tatalokbaji taoksatsüka lir," ta Open Doors UK's director of advocacy & public affairs, Dr. David Landrum-i ashi.

Open Doors-i ashiba agi, alima nung Khristantem tamajungba reshikangshiba linük 50 rongnung Venezuela densema mali, ajisüaka tawa Latin America tesem aika nung Khristantem anema inyakba kanga bulua kümdar.

Nüburtemi municipal corporations nunga temelenshi aginer: Kejriwal



New Delhi, March 03, 2021: Bodhbarnü New Delhi nung Delhi CM Arvind Kejriwal aser Deputy CM Manish Sisodia nati Municipal Corporation election nung takok angur AAP candidate tem den tangokba noksa nung angur. AAP-i menden 5 nungi menden 4 tashi nung takok nguogo.

New Delhi, March 03 (Agencies): Delhi Municipal by election nung AAP-i takok anguba sülen Delhi Chief Minister, Arvind Kejriwal-i, AAP-i municipal elections nung takok anguba ajanga AAP-i Delhi yimsüsüba agi nüburtemi melung asüba kuli sayur, ta metetdaksü.

Delhi nung sorkar school tem aser hospital tem tajungba akümba, light aser tzi supply den gari lenmang tajungba akümba agi nüburtemi AAP sorkar dak tamang akar, ta pai ashi.

AAP-i election nung takok anguba sülen party nung inyakertem den benjungteptsü atema DDU Marh nung aliba AAP office tonga aoba sülen jembidang pai, "Tang election osang ya ajanga sangküm civic body election koma asütsüar ibaji sayur. Onoki ibaji atar aser onoki iba yimti kanga merüka kümdaktsüsü," ta metetdaksü.

February 28, 2021 nü civic wards pongu nung by election agi aser menden pongu nungjagi AAP-i menden pezü tashi nung takok angu;

tanungba menden kaji Congress-i angu.

By election nung BJP-i menden ka nungdanga takok manguba atema BJP aija Kejriwal-i, "BJP-i tazungla angubaji ajanga nüburtemi MCDs nung auyaba aser ochimashi sendokba sayur," ta ashi.

AAP tongti lenir, Kejriwal-isa, nüburtemi Delhi nung aliba municipal corporations asem nungji temelenshi aginer, ta ashiba den külemi tang tasen shimba councilors ajak dang kanga ochishia aser nendaka inyaktsü ajungshi.

Assembly Elections nung aluyimertemi BJP anema nübo ayimtsü

New Delhi, March 03 (Agencies): Tang India linük nung aluyimba ozüng tasen asem anema longkak aiter aluyimer lenirtemi assembly election agitsü aliba state temi oa BJP anema toktepa party tem atema nübo yimtsüsü, ta osang ka ajanga metetdaksü.

Aluyimertem unions balalai akümba tentet- Sanyukta Kisan Morcha (SKM)-i linük tesem ajungalen "MSP Dilao Abhiyan" (onok nem MSP agüjang campaign) tenzüksü, ta metetdaksü.

Aluyimertemi parnok nem minimum support price (MSP) agüjang ta legal tenangzükba akhanger, aser iba dak sendakba nung aluyimertemi India south tsütsü Karnataka, Andhra Pradesh aser Telangana nung tama sentongtem agiba sülen tanga state tem nunga agitsü.

BKU lenir, Balbir Singh

Rajewal-i, "Onoki team balala West Bengal aser Kerala ama election agitsü aliba state temi yoktsü. Onoki yimtenren party ka danga meyaritsü, ajisüaka nüburtem dang BJP tamakok ngudaktsüsüpur candidate tem yariang ta mepishitsü; Modi sorkari aluyimertem mezüngshiba atema onoki ibaji inyaktsü," ta metetdaksü.

Swaraj India nungi Yogendra Yadav-ia, "Onoki nüburtem dang aluyimertem anema ozüngtem benokba party (BJP) aser par teloktep party tem nem temerenshi agüjang ta mepishitsü. Iba sentong ya March 12 nü Kolkata nung tenzüksü," ta metetdaksü.

Sanyukta Kisan Morcha nungi lenirtemi election agitsü aliba states- Tamil Nadu aser Assam nata semdangtsü, ajisüaka parnoki talisa West Bengal aser Kerala nung tongtibangba rangloker inyaktsü,

kechiyong state ana nungji left parties den tesendaktep aliba All India Kisan Sabha (AIKS) züngsem aika lir.

Singhu arrtsü nung aluyimertem unions senden amenba sülen SKM-i March 15 tashi longkak aittsü atema sentong balala sangdongtsü.

SKM lenir, Darshan Pal-i, "India tesem ajungalen March 6 nü ki aser office tem nung wako tanak asongtsü aser sorkar anema longkak aittsü," ta metetdaksü.

March 8 nü International Women's Day anogomong nung SKM-i 'Mahila Kisan Diwas' ayongzüka amongtsü, aser iba anogo nungjibo SKM-i longkak aitba tesem ajak nung tetsür aikati shilem agitsü aser tetsürtem nem o jembidaktsüsü, ta SKM-i metetdaksüogo.

March 15 nü SKM-i central trade unions 10 den longjemer "anti-privatisation" day amongtsü.



New Delhi, March 03, 2021: Myanmar nung sepaitemi yimsüsüba China-i pusemba atema Bodhbarnü New Delhi nung aliba Jantar Mantar nung Myanmar nung er refugee temi China anema yimyim ayimba noksa nung angur.

Sempet alir lanurtem atema sector balala nung maongka lir: PM Modi

New Delhi, March 03 (Agencies): Sempet alir lanurtem atema sector balala nung kishi lapokja dang lir; item sector rongnung space, atomic energy aser agriculture densema lir, ta Bodhbarnü Ato kilonser, Narendra Modi-i metetdaksü.

Union budget nung shisaliok sector atema senotsü lezmüksüba dak sendakba sentong ka nung jembidang Ato kilonseri, National Education Policy tasenba ajanga local oshitem ajungshir, anungji shisashirtem aser oshi balala nung mongintemi linük nung aliba shisaliok tajungtiba bendena renemtsüla, ta ashi.

Modi-i, linük nung health sülenbo tanabuba jenjang nung shisaliok, skill, research aser innovation nung rangloker budget lezmüksüogo, ta

metetdaksü. "Union Budget ajanga shisaliok, mapa maongka aser shishilembaba maparen sendakteptsü nükjidong nung inyakogo," ta pai ashi.

Ibaji ajanga tanübo scientific publications tajungtiba linük asem rongnung India densema lir, ta Ato kilonserisa metetdaksü.

"Iba tangatetba nung sempet alir lanurtem atema space, atomic energy, DRDO aser agriculture densema sector aika nung lenmang lapokja lir," ta pai ashi.

India-i tangar dak memetaloki pei sasa alitsü atema linük nung lanurtemi pei sasa melung lemteta alitsüji kanga tongtibang; lanurtemi shisaliok aser shisatsü nung tamang katet nungang peisasa melung lemtettsü, ta paisa ashi.



New Delhi, March 03, 2021: India tesem ajungalen Covid vaccination tanabuba shilem nung teintet sensotem coronavirus vaccine agiba mapang Bodhbarnü New Delhi nung Tir, Ram Nath Kovind-a coronavirus vaccine agiba noksa nung angur.

Karnataka Minister Jarkiholi-i menden nungi anen

Bengaluru (Karnataka), March 03 (Agencies): Karnataka Water Resources Minister, Ramesh Jarkiholi-i mapa agütsüsü ta nangzüka tetsür ka den medemba video tape ka jungkai adokba sülen Bodhbarnü pai Minister menden nungi anenba shidi Chief Minister, BS Yediyurappa nem agütsüogo.

Chief Minister dangi züluba shidi nungji Jarkiholi-i, "Ni anema tai tongloksübaji ochi masü, iba ya tekaraba nung bushisüngdangtsüla. Ni aibelena mali, ajisüaka ni kuli agia Cabinet Minister menden nungi anener. Iba shidi ya agizüksü ni nü dang mepishir," ta shia lir.

Karnataka minister aser tetsür ka na azüapongba video tape ka online ajanga prokshiba ajanga Karnataka nung BS Yediyurappa-i aniba BJP sorkar kanga maaksüogo.

Ajisüaka Minister, Jarkiholi-ibo iba video ji taila, ta shiogo.

Osang angazükba agi, party nung bangdak lenirtem tetuyuba nung ajemdaker Jarkiholi-i minister menden nungi anentsü shidi agütsü.

State pezü aser Puducherry nung assembly election agitsü

mapang ana nung aliba den külemi state nunga panchayat election agitsü aliba nung ajemdaker BJP national general secretary in-charge Karnataka, Arun Singh-i party telemtebaji state nung lenirtem nem metetdaksü.

Karnataka Home Minister, B Bommai-i, "Ozüng nung ajemdaker bushisüngdang tenzükogo. Pa anema tekaraba nung party-i telemteba agitsü," ta tamalen metetdakja liasü.

State nung opposition Congress aser JD(S)-ia, pa tangsa Minister menden nungi anendaktsüsüla, ta takhangba agüja liasü.

Mongolbarnü social activist, Dinesh Kallahalli-i, minister-i mapa agütsüsü ta nangzüka tetsür la den shi nung medemtsü amokmerena liasü aser lar kibong-a amokmerenogo, ta shia Ramesh anema police nem ken o agüja liasü.

Ramesh Jarkiholi ya Gokak nungi MLA lir. Tamalen pa Congress nung liasü aser state nung Congress-JD(S) teloktep sorkar chireper BJP-i sorkar akümba nung pai tongti shilem agia liasü.

Police temi Myanmar nung longkak aiter nisung 9 khaset

Naypyitaw, Metsüremi/March 03 (Agencies): Myanmar nung rongrong adoka aliba tangatetep kati arudaktsütsü asoshi kidanger linüktemi jembiba sülen anogo ka lir mitkari yimsü asüba anema longkak aiter dak Myanmar security forces temi Bodhbarnü injang khalokja nisung teku khaset, ta osangtem ajanga ashi.

Election ajanga shimtetba Aung San Suu Kyi'er sorkar February 1 nü mitkartemi atsüngdokba anema longkak aitiba azüoktsü asoshi mitkartem temolungtetba tulu nung lir amai ajiteter, aser parnoki jila aser yimti kar nung longkak aiter dak injang khaloktsü.

"Parnok onok alileni jaja aru aser tear gas khaloktsü, ano jaja aru aser stun grenades amshi. Iba sülen parnoki water cannon nungi tzü khaloktsü, tekümdangtsü kecha masü aser parnoki injang khaloktsü," ta Myingyan jila nung longkak aiter lenir Si Thu Maung-i osangbener dang ashi.

Myingyan nung teburchanu ka asü aser Monywa jila nung tebur pezü aser tetsür ka asü, ta Monywa Gazette zülur Ko Thit Sar-i ashi.

"Onoki kinunger aser doctor tem den jembio aser nisung pongu tepsetba jangjaogo. Nisung tajemba agi 30 shi yiru, aser karbo tang tashi nüji dangi maru lir," ta pai osangbener dang ashi.

Mandalay yimti nunga nisung ana tepset aser Yangon nunga police temi injang khalokja nisung ka khaset, ta tenük kuli alirtemi ashi.

US/EU ajanga tenokdangba agütsüba Russia-i retreta magizüker

Moscow, Metsüremi/March 03 (TYO): Moscow-i opposition politician Alexei Navalny mejungi amshiba mechi United States aser European Union ajanga tenokdangba agütsüba agi timtem balaka majurutsü, ta Kremlin-i Bodhbarnü ashi saka telangzüba agütsütsü, ta shiogo.

Taoba küm Moscow-i nerve agent miim amshia Navalny tepsettsü merangba asoshi Russia merenshitsü atema United States-i Kremlin nem Mongulbarnü tenokdangba kar agütsü.

Arishi küm 44 tain Navalny ya August ita Siberia nung tayimtsü ka nung lia temang mejungi akum aser Germany-i tayimtsü ka nung bener ao, kong pa dak nerve agent miim amshia lir, ta doctor temi ashi. Pa shirangba nung shilem kecha mali aser pa dak miim amshiba kuli mangur, ta Kremlin-i shia lir. Washington-i Russia nunger



Yangon, Myanmar nung lenmang shibanger aliba tesem ka anasa mitkartemi sorkar atsüngdokba anema longkak aيتدang safety helmets agir yimyim ayima temeyong asem agi salute agütsüba noksa nung angur. Taoba ita Myanmar mitkartemi sorkar atsüngdokba anema nüburtemi longkak aitiba manener, kong police temi longkak aiter nisung 31 tepsetogo.

Mitkartemi sorkar atsüngdokba sülen tang tashinung nisung 31 tepsetogo.

"Linük ya yimti timba nung Tiananmen Square mesüka lir," ta Archbishop of Yangon, Cardinal Charles Maung Bo-i Beijing nung 1989 küm kaketshirtemi anir longkak aitiba ajemreptsüba den athishia Twitter nung ashi.

Southeast Asia linüktem nungi foreign minister temi tazüokba alitsü ajungshir anogo ka lir azüdokshi ya ataloker. Parnoki Suu Kyi chiochtsü aser democracy tanaben lidaktsütsü ashi saka takok mangu.

Yangon nung security forces temi longkak aiter nisung 300 shi apu, ta Myanmar Now news agency ajanga ashi.

Asürtem taküm bendanga agütsüba amajok makumtsü, ta

democracy activist Esther Ze Naw-i osangbener dang ashi.

"Onoki maneni iba tongpang nung nokdaksü aser akoktsü. Onoki akoktsü," ta lai ashi.

Mongulbarnü Association of Southeast Asian Nations (ASEAN) indang foreign minister tem Myanmar atema virtual senden ka mena liasü, saka iba senden amenba tajangzük kecha meliasü.

Iba senden nung adener ajaki atsüanem akatsü ashi saka züngsem pezüi - Indonesia, Malaysia, Philippines aser Singapore - dang Suuk Kyi aser dangartem pua aliba chiochtsü ashi.

"Tesunep aser yimya tajung nung Myanmar yaritsü asoshi ASEAN renema lir," ta ASEAN mendenpuba, Brunei-i sangdong ka nung ashi.

ketdangtsür tenet aser entity 14 anema Mongulbarnü tenokdangba agütsü.

United States yagi European Union den tangatetep nung iba mera ya agi, shirnoki Russia nunger ketdangtsür pezü nem yimya ka amai tenokdangbatem agütsü lir.

Moscow-i aginüba yimya nung meyipa agütsütsü, ta Kremlin odongtar Dmitry Peskov-i ashi.

"Melentepa tajangzük angutsü tangatetba amshitsübo tamakoktsü. Iba amala telemtetba ya metemsü aser shidak masü ta züngshir, aser iba nungya tetetzü mali mesüra timtem mali. Iba atema onoki sasa bilemer aser mangateter," ta Peskov-i osangbener dang ashi.

Ajisüaka US-i tenokdangba agütsüba ajanga ketdangtsürtem timtem majurutsü kechiaser parnok mapa ya kanga tongtipang asünung Russia

alema aotsü memelar, bendanglen ki-o-jen nung kibur asütsü memelar mesüra bendanglen bank account tem lapoka amshitsü memelar, ta Peskov-i ashi.

"Ibai Russia nunger ozüing kübok item nisungtemi ajangshiba tenokdangba indang ajizüka amshiba ka dang lir. Entities dak tenük yoker tenokdangba agütsüba ajanga rongsenren nung kongshitsü," ta paisa ashi.

Ajisüaka item tenokdangba ya ajanga United States aser European Union den Russia tesendaktep raksatsü, ta Peskov-i ashi.

Nerve agent amshi ta anüolen linüktemi ashiba miim mozü agi temang nung timtem agütsüba anepalua Germany nung munger January ita Navalny meyipa shilangba mapang Moscow nung aliba airport ka nung apu. Pa ya taoba ita nungi tepuokdak yua lir.

ASEAN senden nung mitkari shimtetba foreign minister dena regional aser international ken o nung tangatetba lemsatep, ta Myanmar indang state media ajanga ashi saka Myanmar tebilemtsü nung ranglokba indangbo mashi.

November election nung tim masüba mapa inyakba indang onük Wanna Maung Lwin-i senden nung benoka jembi, ta ashi.

November 8 nü election agiba mapang ashikülak mapa inyak ta mitkartemi ken o

Afghanistan anüdoklen IS temi osangbener asem tepset

Jalalabad, Metsüremi/March 03 (Agencies): Afghanistan anüdoklen osangbener tetsür asem tepsetba lendong asoshi Islamic State temi tenüing agiogo.

Iba telungpur telok ya Afghanistan nung lir aser anüdoklen Jalalabad yimti nung aliba television station ka nung inyaker tetsür asem dak tenük yoker Mongulbar nikongdang amak, ta SITE Intelligence group ajanga ashi.

Item tetsür asem ya Enikas TV atema inyaker aser parnok ya arishi küm 18 aser 20 tsüngta liasü, aser parnok ya mapa nungi kidangi meyipa aoba mapang injang khaloktsü, ta Afghan ketdangtsürtemi ashi. Bodhbarnü sarasadem sentong ayongzükba sülen parnok temang remogo, ta provincial council züngsem kati ashi.

Kasa lendong nungya tetsür ka yiru aser la ya mozüki nung anepaluba mapang lir, ta mozüki ketdangtsürtemi ashi.

Lendong atalokba tesem nung alirba police temi

benokba senzüka yutsüba ajanga sorkar atsüngdok, ta mitkartemi ashi. Iba election nung Suu Kyi'er teloki takok angu, aser küm pongu kümsük tanabuba ajangzüka liasü. Election commission-ibo election tajungtiba nung agiogo, ta ashir.

Myanmar nung democracy wazüka ayutsü asoshi teka amuok, ta mitkar lenir Senior General Min Aung Hlaing-i ashi aser election tasen agitsüa nangzük saka anogo atakzüka mali.

Mitkartemi sorkar atsüngdokba ya Myanmar asoshi mera atsüngzüka aoba ka lir aser tashiyim amshiba ya teraksa tulu lir, ta Singapore Ato Kilonser Lee Hsien Loong-i Mongulbarnü ashi.

Longkak aiter temi social media nung nüburtem ayongshir aser ozüing alema lokti tenteter, ta Myanmar state television ajanga Mongulbar nikongdang sangdonga liasü.

Arishi küm 75 tain Suu Kyi ya dangar den osang-ola magitepteti yua lir saka hopta tetenzüklen video conference ajanga okadak la anema ken o jembiba nung shilem agia liasü aser la temang junga lir amai nguogo, ta okatsür kati ashi.

Myanmar nung mitkartemi sorkar atsüngdoker nisung 1,300 jungnüa apuba rongnung la ya ka lir.

mezüingbo Taliban telok dak tai tonglokja liasü, saka parnoki iba lendong nung shilem magi, ta ashi. Afghanistan Tir Ashraf Ghani-ia iba lendong ya aitsüogo.

"Tai maket linük meimer, talisa tetsür dak amakba ya Islam tesayuba, Afghan yimsü, yimjung tanüla den meputeper aser tang ajangshia aliba timtem aser rara tamajungba aser talangba kumdaktsür," ta Ghani indang office nungi sangdong ka ajanga ashi.

Afghanistan temeket nung azüdokshiba tali kumogo aser Qatar yimtiba, Doha nung yimjung maparen inyaktepaka tawa tanü jila nung media worker aser civil society züngsemtem dak tenük yoker lendong agütsüba tali akumer.

Küm aika raraba tatem kati arudaktsütsü asoshi yimtenren tsütsü tangatetep kati arutsü mechi Afghan sorkar aser Taliban tsüngta jembishinüa arur. Saka Washington nung Biden administration tasenba ajanga yimjung maparen asadangba ajanga jembishinü nung terenlok atsüdaka ayur.

Bunny Wailer arishi kum 73 nung süogo



Metsüremi/March 3, 2021 (Agencies): Nüngtugu reggae kentener Bunny Wailer arishi kum 73buba nung süogo. Bunny ya The Wailers nung nüngtugu kentener Bob Marley den külemi shilem agia liasü. Pa 2020 kum strok asüba sülen mozüki ka nung asü.

Pa asüba osang ya pa indang manager Maxine Stowe aser Jamaica indang Culture Minister, Olivia Grange nati jangjatsüogo.

Sangdong ka ajanga Grange-i, "par kibongi mepeshiba ama ni temulung zürepa patriarch, adianu, tembar aser Jamaican music icon, Bunny Wailer asüba osang lemsateper. Bunny

Asenoki Bunny indang music aser par kibong bilemtetti.

Bunny indang career nung pai 'Simmer Down' aser 'Stir It Up' amala kentem nung shilem agiogo aser pai Grammy asem tashi kokteta lir. Pa nem 2017 kum Jamaica's Order Of Merit dena agütsüogo.

Pa asüba osang angazüka Shaggy-i akhüm tetushi agütsüogo. Kingston nung soa intetsang arishi kum 52 tain 'It Wasn't Me' ken atensangi ashiba agi, Bunny asüba ya reggae aser Jamaica nung atema kanga takoksa tulu lir.

Pai Instagram nung: "2021 ya 2020 dang nungi tajungba masütsü ta jangjaogo, iba ya ozü sobaliba puti otsü nung tajemzüküta mapang ka lir. Bunny Livingston aka: Bunny Wailer ya the Wailers nguteter rongnung ka aser parnok asem rongnung pa dang taküm liasü aser tang paa asenok den mali. Pa asüba ya reggae, Jamaica nungertem aser alima ajunga nung Reggae fan tem atema takoksa tulu lir. Nai onok nemadangdaksüogo. Asür kinungtertem den asükhu lemsateper.. Bunny na tesunep nung anisüngzükang..Nü music teti alitsü," ta Shaggy-i zülutsü.

Wailer shiba tenüng chichibabo Neville O'Riley Livingstone lir, pa tanü 9:00 ako nung Andrew's Memorial Hospital, Kingston nung asü. Nüngtugu kentener, ken mejemer aser percussionist asüba mang ayimer aser taküm aliba mapang pai ajangetbatem benjunger...

"Bunny, Bob Marley aser Peter Tosh nungeri Reggae music alima kinük pezüsüi prokshia yokba kanga nema danga bilemteter. Tanü Wailer züngsem tatembangbuba süogo. Bunny Wailer-i mezümpur aser linük music nung standard-bearers ama Reggae atema kechi inyaksü aji teti alitsü.

Oppo F19 Pro, F19 Pro Plus India nung March 8 nü sayatsü

Metsüremi/March 3, 2021 (Agencies): Oppo F19 series India nung March 8 nü sayatsü, ta Oppo India-i metetdaksüogo. Oppo F-series nung Oppo F19 Pro aser Oppo F19 Pro Plus 5G densema lir. Iba series ya taoba kum sayaba Oppo F17 series den tatongtep series asütsü, kong vanilla Oppo F17 aser Oppo F17 Pro densema liasü.

Oppo F19 series sayaba sentong ya anepdang 7:00 ako nungi tenzüksü, ta Chinese tech company yagi Twitter ajanga sangdongogo. Oppo fan temi iba sentong ya Oppo indang Facebook, Twitter, Instagram, aser YouTube channel tem nung live reprangtetsü.

Promotional poster nungsa taruba smartphone tem ajungkettsü atema India musician Nucleya (Udyan Sagar) den company longjemba sayaogo.

Oppo F19 Pro aser Oppo

F19 Pro Plus indang osang aikabo mejangja saka phone anarongnung ka nungbo quad rear camera keta alitsü. Temetetsükaji Oppo F19 Pro Plus nung 5G connectivity support angutsü. Tawa phones indang microsite live sayaba mapang Oppo F19 series ya Oppo online aser offline channels tem dak alia tanga -commerce platform tem ajanga ayoktsü ta sangdongogo. Tipster Sudhanshu-i Oppo F19 Pro aser Oppo F19 Pro Plus indang osang kar lemsatepogo kong phone jenjang densema lir. Iba osang ya pai tweet asü koba tangbo intokogo.

Osang ajanga ashiba agi, Oppo F19 Pro 6GB + 128GB variant ya sen 20,000 shi asütsü aser Oppo F19 Pro Plus + 128GB model ya sen 25,000 shi asütsü. Specifications dak sendakba nung Pro model nung 6.4-inch AMOLED display aser octa-core MediaTek Helio P95

SoC keta alitsü. Oppo F19 Pro nung quad rear camera setup ka keta alitsü akok kong 48-megapixel primary camera ka, 8-megapixel ultra-wide-angle camera ka, 2-megapixel depth sensor ka aser 2-megapixel macro shooter ka keta alitsü imlar. Tejaklen 16-megapixel selfie shooter ka keta alitsü akok.

Kasa mapang nung Oppo F19 Pro Plus nung kasa display saka MediaTek Dimensity 800U SoC keta alitsü imlar. Iba phone nung rear camera setup ka keta lir, kong 64-megapixel primary camera ka, 8-megapixel ultra-wide-angle camera ka aser 2-megapixel depth sensor ka inokja alitsü akok. Oppo F19 Pro Plus tejaklen 32-megapixel selfie shooter ka inokja lir ta angazükogo.

Osang agütsüri ashiba agi, phone nung in-display fingerprint scanner ka aser 30W fast charging support asüba 4,500mAh battery ka keta lir.

Florence Pugh-i 'A Good Person' nung shilem agitsü

New York, Metsüremi/March 03, 2021 (Agencies): Project tasen - 'A Good Person' nung Florence Pugh aser Morgan Freeman nati tongti shilem agitsü terenemba lir.

Zach Braff-i direct asütsü aliba film tasen atema actor Florence aser Morgan na aniokogo aser project atema Zach-i script zülutsüogo.

2019 kum nungi Florence aser Zach na nüknüratepa arudar aser kasa kum pai 'In The Time It Takes to Get There' direct süogo, kong Florence-i tongti shilem agir. Ano külen,

2017 kum sayaba 'Going In Style' nunga Morgan aser Zach

Braff na longjemmer inyakogo. Iba project dak alaka, Pugh-i courtroom drama 'Dolly' nung shilem agitsü.

Arishi kum 25 tain actress Florence-i aruya aliba sci-fi flim nung tongti shilem agitsü. Iba film ya Elizabeth Bear-i züluba 'Dolly' nung ajemdaker yanglutsü, kong iba robot doll (Dolly - Florence indang character) yagi lar kibur tepseter, saka lai la sasa tai mali ta kuli agütsü aser iba ken o atema lai lawyer ka akhangba indang otsü alitsü.

'The Shape Of Water' script zülur Vanessa Taylor aser 'Hotel Artemis' otsü zülur Drew

Pearce nati Dolly kaket nungi script zülutsütsü.

Apple TV+ atema Apple Studios-i iba movie yanglutsü rights nguogo. Streaming platform aser movie studios tsüngda bid asüba sülen Apple TV+-i rights angu.

Ajisüaka, film atema director aser script tetemjen ka nüngdaker asünung, iba film atema maparen metenzük lir.

Sentong tem takok ngura, Apple aser Artemis-i pa meyong Point of No Return Films banner longjemmer iba film produce asütsü. Kasa mapang Florence-i executive producer ama inyaksü.

TEPELA LEMSATEPER

Onoki teti meima alaiba asür **Moyangangnen**, pa shirang mapang tepiyong aser alima nungi pilaba mapang tashi lokti tentettem, arogo, kija aser kibongtem, town aser yimtsüng balala nungi shirnokisa temeim aser teyaritep lenmang balala ajanga ozü dang aria bilemba temeim agi yaritepogo, nenok ajak dang ozü temulung taroktiba agi kanga pelaba lemsateper.

Asen Kibuba temoatsü nenok ajak den teti talubosa lidakjang ta ozü sarasadem.

Talisa item kija aser kibongtem dang kanga pelar;

1. Dr. Sentila Longkhum PHC
2. Dr. Limayanger
3. Mr. Mrs. Imchamongba, Longkhum
4. Mrs. Tamsuyangla Mongro, Longkhum

Temeim kinungsü, chirnur, anükapangtem aser semchirtem



Late. Moyangangnen
15/3/1947 to 24/2/2021

Seyochung jila nung sorkari tesem aika lapoktsüogo

Dimapur, Metsüremi/March 3 (TYO): Advisor, Urban Development & Municipal Affairs, Dr. Neikiesalie Nicky Kire-i, March 3 nü Kiphire District kübok Seyochung nung Town Council Hall ka semzüktsüogo.

Council Hall semzüktsüba sentong nung Dr. Neikiesalie-i, Seyochung temeket nung aliba nüburtem dang iba tesem terenlok temulundang yur tarutsü nung maangka tali bendenloksü atema town council den teka amteper inyaksü ajungshi.

Kasa mapang nung Geology & Mining, Soil & Water Resource, Chairman NSMDC Minister V.Kashiho Sangtam-i, March 3 nü Seyochung jila nung 'Rural Marketing Complex' tasen ka lapoktsüogo.

Iba complex nung Seyochung jila nung aliba lanur aser tetsür entrepreneurs temi shishilembatsü.

Sentong nung o jembiba mapang V. Kashiho Sangtam-i, iba complex ya mapang talangka nungi kanga nüngdaka aliba ka ta bilema liasü, kechiyong jila renlokyonga aor anungji infrastructure den connectivity nüngdaker, ta ashi.

Maneni Minister of Health & Family Welfare, Department, S. Panguy Phom-i kasa anogo Seyochung jila nung Community Health Centre ka lapoktsüogo.

CHC lapokba sentong nung pai, tang lapoktsüba centre ya nüburtem atema lir, anungji iba centre takok angutsü atema nüburtemi shilem agiba dak keta lir, ta ashi.

India nung 'Azadi Ka Amrut Mahotsav' amungtsü

Dimapur, Metsüremi/March 3 (TYO): Chief Secretary of Nagaland, J Alam, IAS-i sangdong ka ajanga, India sorkari India nüjiso ngur kum 75 ajungba nüngdem nung national aser international jenjang nung 'Azadi Ka Amrut Mahotsav' sentong ayongzükü amungtsü, ta metetdaksü. India Ato Kilonser-i March 12 nü Gujarat nung iba sentong tenzüksütsü, ta pai ashi.

Iba dak sendakba nung Chief Secretary-i March 3 nü State Government Departments balala nungi ketdangsertem den senden ka ayongzükü menogo. Alam-i ashiba agi, iba sentong ya 2022

August 15 matong tsüngda hopta 75 lia tenzüksü aser iba dak ajemdaker 2021 March 12 ya sentong tenzüksüba anogo asütsü shimogo.

Paisa, iba anogo Azadi Ka Amrut Mahotsav' mesera 'India@75' sentong ya State aser Union Territories ajak nung tenzüksü ta ashi.

Senden nung linük ajunga den jangyumedema Nagaland nunga March 12, 2021 nü state yimüba nung India@75 sentong agitsü telemtetba agi. Senden nungsa taruba hopta 75 atema sentongtem calendar ka yanglutsü telemtetba agi.

Zunheboto nung ketdangsertem den tepila sentong agi

Dimapur, Metsüremi/March 3 (TYO): Zunheboto district administration staff temi ketdangser asem atema Deputy Commissioner's conference hall nung March 3 nü tepila sentong ayongzükü agiogo. Iba sentong ya SDO(C) Renbemo Ezung lenisüba kübok agi.

Sentong nung o jembiba mapang Deputy Commissioner, Peter Lichamo-i, outposts nung alirtem densema ketdangser teneti district toktsür aotsü, shirnoki parnok mapa kanga takok ngua inyakogo, ta ashi. Paisa, parnoki bendanga agüja inyakba aser district ajungkettsü atema teyari tulu agütsüba asoshi pelaba lemsatep.

District toktsür aoba ketdangsertem rongnungi ADC (hq.) Hito Sema, EAC (Dev) Er

Mechietsho Koza aser EAC (hq) Orenthung Kikon nungeri o jembiba mapang Zunheboto district nung mapang tatsüka inyakdang kanga jangradema inyakba bilemtetshia jembia. ADC-isa, ZTC staff tem dang kanga pelaba lemsatep shirnoki teti teka amteper inyaka arudar.

Mechietsho aser Orenthung nati tangazükba ajak atema DC nem tenüngsang agütsü aser staff tem dang maneni pei mapa bendanga agüja inyaksü ayongzük.

Maneni staffs, DBs aser ZTC tenüng nung Newto A, PA to DC Vikheho aser office superintendent (ZTC) Vihuli nungeri tepila o jembia liasü. Iba sentong ya EAC (Judl), N Nyamok Konyak-i tepela anküp o jembiba sülen tembang.



Kohima, March 3: Nagaland Cricket Association tawabangba kübok Phek District Cricket Association (PDCA)-i Phek aser Pftusero jila nung cricket practice pitches kaka yangluogo. Phek jila nung iba pitch ya SDO (Civil) Phek Zhoi Lohe-i February 27 nü jila nung aliba lanurtem nem bendanga agütsüogo. Kasa mapang nung Pftusero nung Deputy Director, Department of Tourism Veyelo Doulo-i iba pitch March 1 nü lapoktsüogo. Noksa nung Deputy Director, Department of Tourism Veyelo Doulo den PDCA züngsemtem tangokba angur.

AlBA champions & veterans committee mendenbula asütsü Mary shim

Metsüremi/March 3, 2021 (Agencies):

World championship trokben tashi koker alila M C Mary Kom, International Boxing Association (AIBA) indang champions and veterans committee mendenbula asütsü shimogo. Iba telok ya taoba küm AIBA-i tentetja liasü.

Arishi küm 37 tain 2012 Olympic bronze-medallist ya AIBA indang board of directors temi vote agütsüba sülen shima liasü.

"AIBA board of directors temi vote agütsüba mail agizükba sülen AIBA Champions and Veteran Committee mendenbula asütsü asoshi na shimba pelashishia

metetdaksür," ta AIBA tir Umar Kremlev-i shiti ka ajanga metetdaksü.

"Nü shistsü aser tajangshibatam amshia iba committee takok dangi anitsü ta ni temulung lema bilemer," ta paisa ashi.

Iba committee ya taoba küm December ita tentet, kong linük balala nungi nungtugu boxing veteran aser champion tem densema lir, shirnoki takok tajung aika ngutetogo aser parnok tajangshibatam lemsateptsü atema renema lir.

Panel nung tanga züngsemtem tang tashi mejangjai lir. Mary Kom tang Spain kübok

Castellon nung Boxam International Tournament nung shilemagidar aser lai iba maongka agütsüba atema kanga pelaba lemsatepogo.

"Iba maongka tasen agütsüba atema @Kremlev_U @AIBA_Boxing President aser boxing family ajak dang kang pelar. Ni takok tashi tajungtiba inyaksü merangsü aser @AIBA_Boxing @BFI_official @Media_SAI ajungketsü atema inyaksü," ta lai tweet asü.

Mary Kom, la asoshi tanabuba aser tatemangbuba Olympics atema qualify süogo, koba Tokyo nung July aser August ita asayatsü.

T20I rankings: KL Rahul tanabuba jenjang nung lir

Metsüremi/March 3, 2021 (Agencies):

Bodhbarnü sayaba batsmen tem indang ICC T20 International rankings nung KL Rahul maneni tanabuba jenjang nung lir aser captain Virat Kohli jenjang ka tejak dangi tua trokbuba tongogo.

Rating points 816 nguteta Rahul tang England nung asayar Dawid Malan (915) sülen tangbuba jenjang nung lir aser Kohli-ia point 697 nguteta lir.

Pakistan skipper Babar Azam (801) jenjang ka tejakdangi tua tasembuba aser Australia white-ball captain Aaron Finch (788) jenjang ka asepzüka lua jenjang pezübuba nung lir. South Africa nung asayar Van der Dussen-a (700) jenjang ka tejakdangi tua pongububa tongogo.

New Zealand aser Australia nung asayatem tang asayaa aliba asayamung nung asaya ana asayaba sülen rankings nung temlenshi aika adokogo.

New Zealand left-hander Devon Conway Conway-i Christchurch nung asayaba mapang out mesüi run 99 yangluba sülen pa jenjang 46 tejakdangi tua jenjang 17buba nung lir. Kasa mapang nung Dunedin nung asayaba mapang run 97 yangluba sülen opener Martin Guptill-a jenjang asem tejakdangi tuogo aser pa tang jenjang 11 buba nung lir.

Australia nung asayatem rongnung Marcus Stoinis jenjang 77 tejakdangi tua 110buba aser Matthew Wade jenjang 118buba nung lir. Bowler tem rongnung

top five nung kecha temelenshi mali aser Afghanistan nung asayar Rashid Khan (736) maneni temaba jenjang nung lir.

South Africa nung asayar Tabraiz Shamsi (733), Afghanistan nung Mujeeb Ur Rahman (730), England nung Adil Rashid (700) aser Australia nung asayar Adam Zampa (676) nung top five nung lir.

Bowler tem rongnung top 10 nung India nung asayar ka danga mali.

Bowler tem indang list nung New Zealand nung asayar Tim Southee (jenjang ka tejak dangi tua jenjang 6buba), Mitchell Santner (jenjang tenetbuba), Ish Sodhi (11buba) aser Trent Boult (jenjang 24 tejakdangi tua 49buba) nung ajak tejakdangi tuogo.

Malaysia nung chuba chir kati Valencia alizükner

Singapore, Metsüremi/March 3 (Agencies):

Valencia alizüksü atema jangraba indang lemsatepba sülen Malaysia nung chuba chir kati iba Spanish football club alitsü akok ta bilemer.

Johor state crown prince Tunku Ismail Sultan Ibrahim-i, takok angutsü jangraba nisung ka Valencia-i nungdaker, ta ashiba den otsü tasen yangluba ajanga pa ajungmesor, ta ashi

Valencia kibur ya Peter Lim lir. Pa ya Singapore nungi billionaire shishilembar ka lir.

"Ni shishilembar ka masü, ni chuba chir," ta arishi küm 36 tain Tunku Ismail-i Instagram nung lemsatepba liasü, koba tangbo aginatokogo, saka

media-i screenshots ama post süa liasü.

"Ni club logo mesera sobaliba melenshitsütsüba nisung ka masü," ta pai ashi.

"Valencia-i kechi nungdaker? Nenoki football asaya jangjaa aliba, takok asoshi tsüraba, asaya kanga süoki ia agiba aser Valencia koda tulu aji angatetba nisung ka nungdaker," ta pai zülutsü.

Tunku Ismail-i, Malaysia indang Johor Darul Ta'zim club alizüka lir. Iba club yagi taoba küm Malaysian league tite tenetbuba atonga kokogo aser 40,000-capacity Sultan Ibrahim Stadium ka dena lapoktsüogo.

Lim indang Meriton

Holdings-i 2014 küm Valencia FC euro million 420 agi alizük, kong club sentsüh euro million 200 densema lir.

Ajisüaka takok tajung manguba aser coach melenjen melenba ajanga fan tem den tesendaktep mejungi kümogo.

Valencia-i 2000 tetenzüklen La Liga titles ana aser UEFA Cup ka kokogo aser Champions League finals anaben tashi tonga asayaogo, ajisüaka parnok dang league nung jenjang 14buba nung lir aser relegation-i aitsü point pongu agi dang jenbur lir.

Club jenjang ya euro million 408 asütsü, ta global accountancy firm KPMG-i taoba küm sangdonga liasü.

Swiss Open 2021: Ashwini-Satwik nati takok nguogo

Metsüremi/March 3, 2021 (Agencies):

Mongolbarnü India nung asayar Ashwini Ponnappa aser Satwiksairaj Rankireddy nati Swiss Open 2021 mezüngbuba anogo mezüngbuba round nung Indonesia nung second seeds tarep Hafiz Faizal aser Gloria Emanuelle Widjaja na tsükdaktsüogo.

Ashwini aser Satwik nati minute 38 nung Faizal aser Widjaja na 21-18, 21-10 agi koka tanabuba round-i iogo. Ajisüaka tarep temeyoktep asayarsa Pranaav Jerry Chopra aser N Sikki Reddy nabo mezüngbuba round nung England nung third seeded tarep Marcus Ellis aser Lauren Smith nati 21-18, 21-15 agi kokogo.

Ashwini-Satwik na asaya mezüngbuba game nung telok ana tsünga toktepa asayaba ajangshio. India nung tarep ya 5-2 agi tejakdang ser asaya tenzük saka Indonesia nung tarep yagi kanga junga asayaa 6-5 aküm. Iba sülen tarep ana

tsünga point kaka anana melentepa koka asaya. Point 16-16 aliba mapang Ashwini aser Sikki nati point ana angu saka Faizal o Widjaja nati taruba point angu. Ajisüaka Ashwini o Sikki nati ano point ana atonga ngua mezüngbuba set akok.

Tanabuba game nunga 5-4 agi Ashwini o Sikki na tejakdang ser tenzük aser iba sülen break tashi nung tena 11-6 agi tejakdang liasü. Break sülen Ashwini o Satwik nati asaya amokbanger asaya aser Indonesia nung tarep yagi telangzüba magütsüet. Ashwini o Satwik nati tanabuba game ayong ayonga koka liasü.

Tanabuba round nung Ashwini o Satwik na Indonesia nung tarep Rinov Rivaldy aser Pitha Haningtyas Mentari na den asayatsü.

Kasa asayamung tebur kija asaya nung Kidambi Srikanth-i 18-21, 21-18, 21-11 agi India nung asayarsa Sameer Verma kokogo. Sameer akokba sülen Kidambi pre-quarters-i iogo.

Miami Open nung Roger Federer masayatsü

Miami, Metsüremi/March 03, 2021 (Agencies):

Tan ita asayatsü aliba Miami Open nungi tennis asayar mongin Roger Federer tukadokogo, ta pa indang agent-i metetdaksü.

Taoba season mapang Federer temekok achjilen anaben tashi surgery agiba sülen, 20-time Grand Slam akoksang Federer-i küm ka dak tema tennis asayamung nung shilem magidangi aruogo.

Federer, shiba taküm August ita küm 40 ajungtsü, pai taruba hopta Doha, Qatar kübok ayongtsü aliba hard-court tournament nung shilem agitsü terenemba lir. Taoba Hokolbarnü, Twitter sabang ajanga pa indang noksa ka den "Doha asayamung nung shilem agitsü asoshi terenemba lir," ta lemsatep.

2020 küm February ita Federer-i Australian Open Semi-final nung shilem agir sülen aruya aliba Qatar Open nung pai mezüng asayatsü.

Ano külen, March 14, 2021 nungi Dubai, United Arab Emirates nung tenzüksü aliba Federer-i asayatsü tebilembar lir.

Iba den külemi March 24, 2021 nungi Miami kübok Masters 1000 asayamung nunga Federer asayatsü renemer liasü, saka Hombarnü pa indang agent, Tony Godsick-i e-mail ajanga Associated Press dang Federer Miami asayamung nung shilem magitsü ta osang agütsüogo.

"Doha aser Dubai sülen, pa

(Federer) talidaki aotsü aser melungi training agi tenzüksü," ta Godsick-i züluba shidi nung shia lir.

Miami Open tournament director James Blake-i, Federer-i 2021 küm tanünga tennis asayamung nung shilem agitsü imlaa atar.

"Miami nung Roger nem tanaben iba tite kokdaksütsü asoshi onok yongya liasü. Ajisüaka, asayar tejen ka ama, yirur sülen junga taneptsü anguba mapang tashi senzüsebongtsü aser asaya telemsatem jung junga achaayangtsü nungdaker. Tennis saiapong atema Roger ya ambassador tongtubang ka lir, ajiasünung pa anema lia tour nung shilem agitetba tashi tennis wadang atema tajungba dang alitsü," ta Blake-i ashi.

2019 Miami Open tesüsa asayaba mapang, iba asayamung final akoktsü atema Federer-i 6-1, 6-4 agi John Isner tsükdaksü. Iba sülen, 2020 küm alima ajunga asünga coronavirus tashidak ajanga tongtubang tennis tour rongnung Miami Open densema ita ishika atema tennis asayamung ajak anenja liasü.

Federer-isa 2005, 2006 aser 2017 Miami Open asayamung kokogo.

ATP rankings tasenba nung Federer jenjang 5buba nung lir. Hopta 310 tashi ATP ranking nung Federer world no. 1 jenjang nung liasü, koba Hombarnü Novak Djokovic-i menepa ATP record tie ka aküm.

BILEMDANGANG

"Tamang nung aliba mapang tesangwa angutsü atema rangloktsüla."